

Мамлакатимизда илк бор Фарғона вилоятида ўтказилган “Оналарга эҳтиром” фестивали Марғилонда катта шодиёна билан яқунланди

Бу йил биринчи бор ўтказилган “Оналарга эҳтиром” фестивалининг якуний вилоят босқичи доирасида Марғилон шаҳридаги “Ижодкорлар боғи”да катта байрам дастури ташкил этилди.

Боғ ҳудудидаги амфитеатр вилоятнинг барча шаҳар ва туманларидан келган 1600 дан зиёд мўътабар онахонлар ҳамда аёлларни ўз бағрига жамлади. Боғда эса минглаб вилоят аҳли жам бўлди.

“Оналарга эҳтиром” фестивали якуний босқичи шодиёнасини вилоят ҳокими Хайрулло Бозоров очиб берди. “Ўтказилаётган “Оналарга эҳтиром” фестивалидан асосий мақсади ўзида, биз фарзандлар учун борлиғини фидо қилган Сиз улуғ зотларга бўлган юксак эҳтиромимизни намоён этиш, ўсиб келаётган ёш авлоднинг онги шуурида ота-онага ҳурмат, фарзандлик бурчларини адо этиш, уларни қадрлаш каби фазилатларни шакллантириш каби ғояларни мужассам этган,” деб таъкидлаган вилоят ҳокими, “Жаннатни онанинг оёғи остида деб билган миллатнинг, жамиятнинг вакиллари сифатида Оналарга етарли эҳтиром кўрсатмасак, бошимизда кўтариб юрмасак, Оналар учун яшамасак, унда ҳаётнинг тўлиқ мазмун-моҳиятини, ҳузур-ҳаловатини, баҳтсаодатини билмаган ҳолда кўлдан бой бериб қўямиз” дея фикр билдири.

Муҳтарам Президентимизнинг “Оналаримиз шарофати билан Ватанимиз тупроғи жаннат боғларидек гўзал ва мўътабардир. Оналар дуосидан юртимиз тинч, осмонимиз мусаффо, ишимизда унум, ҳаётимизда барака бор” деган сўзларини иқтибос қилиб келтирган Хайрулло Бозоров, бугунги кунда мамлакатимизда амалга оширилаётган улкан ислоҳотларнинг туб замираиде мўътабар оналаримиз, меҳрибон аёлларимизни эъзозлаш, розилигини олиш, ҳаётларини енгиллаштириш, соғ-саломат бўлиб, баҳтли бўлиб яшашларини таъминлаш мақсадлари мужассам эканини қайд этди.

Очилиш қисмида сўз олган Ўзбекистон Маданият вазири Озодбек Назарбеков, Маҳалла ва оиласи қўллаб-қувватлаш вазирининг биринчи ўринbosари Гулнора Маруфова Фарғона вилояти аёлларига ҳамда улар тимсолида юртимиз аёлларига ўз дил изҳорларини баён қилдилар.

Фестиваль доирасида “Энг маърифатли фарзанд онаси”, “Энг яхши ҳарбийлар сулоласи онаси”, “Энг яхши шифокорлар сулоласи онаси”, “Энг яхши раҳбар она”, “Энг яхши олимна она” каби 25 та номинацияда вилоят миқёсида ғолиб бўлган оналарга мукофотлар топширилди. 1-ўрин эгаларига икки камерали музлаткич, 2-ўринни эгаллаганларга кир ювиш машинаси, 3-ўрин соҳибларига телевизор совға қилинди. Барча ўрин эгаларига вилоят ҳокимининг фахрий дипломи билан ҳам тақдирландилар.

Тадбирнинг концерт қисмини Озодбек Назарбеков ўзининг жозибали қўшиқлари билан бошлаб берди. Зулайҳо Бойхонова, Алишер Файз, Ҳулкар Абдуллаева, Илҳом Фармонов, Абдужалил Кўқонов, Зохиршоҳ Жўраев каби кўплаб республикамида таниқли санъаткорлар иштирокида куй-қўшиқлар, шунингдек вилоят санъат усталари томонидан тайёрланган Она мавзусидаги саҳна кўринишлари байрамга ўзгача шукуҳ баҳш этди.

“Оналарга эҳтиром” фестивали Марғилон узра порлаган ранг-баранг ва ёрқин мушаклар билан яқунланди.

2021-05-31 16:38:44